

小兒藥證真訣

卷二卷三

小兒藥證真訣卷二

四庫館纂修本

宋 錢 乙 撰

三原李錫齡孟熙校刊

搐別真假

李司戶孫病生百日發搐三五次請衆醫治或作天吊或作胎驚或作驚癇皆無應者後錢氏用大青膏如小豆許作一服發之復與塗顙法封之及浴法三日而愈何以然嬰兒初生肌骨嫩怯被風傷之子不能任故發搐頻發者輕何者客風在內每遇不任卽搐搐稀者是內臟發病不可救也頻搐者宜散風冷故用大青膏但不可多兒至小易虛易實多卽生熱止一服而已更當

封浴無不效者

發搐順逆

李寺丞子三歲病搐自卯至巳數醫不治召錢氏視之
搐目右視大叫哭李曰何以搐右錢曰逆也李曰何以
逆曰男爲陽而本發左女爲陰而本發右若男發搐時
目左視無聲右視有聲女發搐時右視無聲左視有聲
所以然者左肝右肺肝木肺金男目右視肺勝肝也金
來刑木二臟相戰故有聲也治之瀉其強而補其弱心
實者亦當瀉之肺虛不可瀉肺虛之候悶亂哽氣長出
氣此病男反女故男易治于女也假令女發搐目左視

肺之勝肝又病在秋卽肺兼旺位肝不爲任故叫哭當
大瀉其肺然後治心續肝所以俱言目反右視者乃肝
主目也凡搐者風熱相搏于內風屬肝故引見之于目
也錢用瀉肺湯瀉之二日不悶亂當知肺病退後用地
黃丸補腎三服後用瀉青丸涼驚丸各二服凡用瀉心
肝藥五日方愈不妄治也又言肺虛不大瀉者何也曰
設令男目右視木反尅金肝旺勝肺而但瀉肝若更病
在春夏金氣極虛故當補其肺慎勿瀉也

潮熱問難

皇都徐氏子三歲病潮熱每日西則發搐身微熱而目

微斜及露睛四肢冷而喘大便微黃錢與李醫同治錢
問李曰病何搐李曰有風何身熱微溫曰四肢所作何
目斜睛露曰搐則目斜何肢冷曰冷必內熱曰何喘曰
搐之甚也曰何以治之曰凡鼻中灌之必搐止錢又問
曰既謂風病溫壯搐引目斜露睛內熱肢冷及搐甚而
喘併以何藥治之李曰皆此藥也錢曰不然搐者肝實
也故令搐曰西而身微熱者肺潮熱用事肺主身溫且
熱者爲肺虛所以目微斜露睛者肝肺相勝也肢冷者
脾虛也肺若虛甚母脾亦弱木氣乘脾四肢卽冷治之
當先用益黃散阿膠散得脾虛證退後以瀉青丸導赤

散涼驚丸治之九日愈

吐瀉爭功

廣親北宅四大王宮五太尉病吐瀉不止米穀不化衆醫用補藥言用薑汁調服之六月中服溫藥一日而加喘吐不定錢曰當以涼藥治之所以然者謂傷熱在內也用石膏湯三服併服之衆醫皆言吐瀉多而米穀又不化當補脾何以用涼藥王信衆醫又用補脾散丁香散三服錢後至曰不可服此三日外必腹滿身熱飲水吐逆三日外一如所言所以然者謂六月熱甚伏入腹中而令引飲熱傷脾胃卽大吐瀉他醫又行溫藥卽上

焦亦熱故喘而引飲三日當死衆醫不能治復召錢至
宮中見有熱證以白虎湯三服更以白餅子下之一日
減藥二分二日三日又與白虎湯各二服四日用石膏
湯一服旋新合麥門冬黃芩腦子牛黃天竺黃茯苓以
朱砂爲衣與五九竹葉湯化下熱退而安

吐瀉問難

廣親宮七太尉七歲病吐瀉是時七月其證全不食而
昏睡睡覺悶亂噎氣乾嘔大便或有或無不渴衆醫作
驚治之疑睡故也錢曰先補脾後退熱與使君子丸補
脾退熱石膏湯次日以水銀硫黃二物末之生薑水調

下一字錢曰凡吐瀉五月內九分下而一分補八月內十分補而一分下此是脾虛瀉醫妄治之至于虛損下之卽死當只補脾若以使君子丸卽緩錢又畱溫胃益脾藥止之醫者李生曰何食而噦錢曰脾虛不能食津少卽嘔逆何瀉青水曰腸胃至虛冷極故也錢治而愈

虛實下藥

馮承務子五歲吐瀉壯熱不思食錢氏乃曰目中黑睛少白睛多面色眊白此子必多病面色眊白神怯也黑睛少腎虛也黑睛屬水本怯而虛故多病也縱長成必肌膚不壯不耐寒暑易虛易實脾胃亦怯更不可縱酒

恣慾若不保養不過壯年面上常無精神光澤如婦人
之失血也今吐痢不食壯熱者傷食也不可下下之虛
入肺則嗽入心則驚入脾則瀉入腎則益虛此但以消
積丸磨之爲微有食也如傷食甚則可下不下則成癖
也實食在內乃可下之下畢補脾必愈隨其虛實無不
效者

寒熱相反

京東轉運使李公孫八歲病嗽而胸滿短氣醫者言肺
經有熱用竹葉湯牛黃膏各二服治之三日加喘錢氏
曰此肺氣不足復有寒邪即便喘滿當補肺脾勿服涼

藥李曰醫已用竹葉湯牛黃膏錢曰何治也醫曰退熱
退涎錢曰何熱所作曰肺經熱而生嗽嗽久不除生涎
錢曰本虛而風寒所作何熱也若作肺熱何不治其肺
而反調心蓋竹葉湯牛黃膏治心藥也醫有慙色錢治
愈

補下不同

段齋郎子四歲病嗽身熱吐痰數日而咯血醫以桔梗
湯及防己丸治之不愈其痰上攻吐喘不止請錢氏下
福銀丸一大服復以補肺散補脾散治之今段氏咯血
肺虛何以下之曰肺雖咯血有熱故也久卽虛痿令涎

上潮而吐當下其涎若使不吐涎爲甚便也蓋吐涎能
虛又生驚也痰實上攻亦使發搐故依法只宜下痰後
補脾肺必涎上而吐愈若先補其肺爲逆先下其痰爲
順先下後補爲良也

癖爲潮熱

曹宣德子三歲面黃時發寒熱不欲食而飲水及乳不
止衆醫以爲潮熱用牛黃丸麝香丸不愈及以止渴乾
葛散服之反吐錢氏曰當下白餅子主之後補脾乃以
消積丸磨之此癖也後果愈何以故不食但飲水者食
伏脘內不能消致令發寒服止渴藥吐者藥衝脾故也

下之卽愈

虛實熱證

朱監簿子五歲忽發熱醫曰此心熱也腮赤而脣紅煩躁引飲遂用牛黃丸三服以一物瀉心湯下之來日不愈反加無力而不能食又下之便痢黃沫錢曰心驚虛而有畱熱在內必被涼藥下之致此虛勞之病也錢先用白朮散生胃中津後以生犀散治之朱曰大便黃沫如何曰胃氣正卽瀉自止此虛熱也朱曰醫用瀉心湯如何錢曰瀉心湯者黃連一物耳黃連性寒多服則痢內傷脾胃也坐久衆醫至曰實熱錢曰虛熱若實熱何

以瀉心湯下之不安又加面黃頰赤五心煩躁不食而引飲醫曰既虛熱何大便黃沫錢笑曰黃沫服瀉心湯多故也錢後與胡黃連丸治之愈

熱不可下

朱監簿子五歲夜發熱曉卽如故衆醫有作傷寒者有作熱者以涼藥解之不愈其候多涎而喜睡他醫以牛黃圓下涎其病益甚至五日大引飲錢氏曰不可下之乃取白朮散末一兩煎藥汁三升使任其意取足服朱曰飲多不作瀉否錢曰無生水不能作瀉縱瀉不足怪也但不可下耳朱曰先治何病錢曰止瀉治痰退熱清

神其藥至晚服盡錢氏曰更可服三升又煎白朮散三升服盡得稍減三日又服白朮散三升其子不渴無涎又投阿膠散二服而安

預說驚疾

廣親宅七太尉方七歲潮熱數日欲愈錢謂其父二大王曰七使潮熱將安八使預防驚搐王怒曰但使七使愈勿言八使病錢曰八使過來日午間卽吾苦也次日午前果作急搐召錢治之三日而愈蓋預見目直視而顙赤必肝心俱熱更坐石杌子乃欲冷此熱甚也肌膚素肥盛脈又急促故必驚搐所言午時者自寅至午皆

心肝所用事時治之瀉心肝補腎自安矣

溫冷用藥

東都張氏孫九歲病肺熱他醫以珠犀龍麝生牛黃治之一月不愈其證嗽喘悶亂飲水不止食不能入錢氏用使君子丸益黃散張曰本有熱何以又行溫藥他醫用涼藥攻之一月尙無效錢曰涼藥久則胃寒不能食小兒虛不能食當補脾候飲食如故卽瀉肺經病愈矣服補脾藥二日其子欲飲食錢以瀉白散瀉肺遂愈七分張曰何以不虛錢曰先實其脾然後瀉肺故不虛也

陰癰壞病

東都王氏子吐瀉諸醫用藥下之至虛變慢驚其候睡
露睛手足痠癱而身冷錢曰此慢驚也與藪藪湯其子
胃氣實卽開目而身溫王疑其子不大小便令諸醫以
藥利之醫畱八正散等數服不利而身復冷令錢氏利
之錢曰不當利利之必身冷王曰已身冷矣因抱出錢
曰不能食而胃中虛若利大小便卽死久卽脾腎俱虛
當身冷而閉目幸胎氣實而難衰也錢用益黃散使君
子九四服令微飲至日午果能飲食所以然者謂利大
小便脾胃虛寒當補脾不可攻也後又不語諸醫作失
音治之錢曰旣失音何開目而能飲食又牙不噤而口

不緊也諸醫不能曉錢以地黃丸補腎所以然者用涼藥利小便致脾腎俱虛今脾已實腎尙虛故補腎必安治之半月而能言一月而痊也

治病有等

張氏三子病大者汗徧身次者上至頂下至胸小者但額有汗衆醫以麥煎散治之不愈錢氏曰大者與香瓜丸次者與益脾散小者與石膏湯各五日而愈

用藥識證

鄭人齊郎中者家好收藥散施人其子忽臟熱齊自取青金膏三服併一服而餌之服畢至三更瀉五行其子